

Na osnovu čl. 123. stav (3) i 131. stav (1) Zakona o zaštiti i spašavanju ljudi i materijalnih dobara od prirodnih i drugih nesreća („Službene novine Federacije Bosne i Hercegovine“, br. 39/03, 22/06 i 43/10), te čl. 22. i 24. stav (1) Zakona o Vladi Kantona Sarajevo („Službene novine Kantona Sarajevo“, broj 24/03 – Prečišćeni tekst), Vlada Kantona Sarajevo, na 28. sjednici održanoj 24. 07 2013. godine, donijela je

UREDBU O ORGANIZOVANJU SLUŽBI ZAŠTITE I SPAŠAVANJA I JEDINICA CIVILNE ZAŠTITE SPECIJALIZOVANE NAMJENE KANTONA SARAJEVO

POGLAVLJE I. OSNOVNE ODREDBE

Član 1. (Predmet Uredbe)

Ovom Uredbom organizuju se službe zaštite i spašavanja i jedinice civilne zaštite specijalizovane namjene (u daljnjem tekstu: jedinice), koje će djelovati na području Kantona Sarajevo (u daljnjem tekstu: Kanton), određuju se pravna lica i udruženja građana u kojima će se formirati službe zaštite i spašavanja, utvrđuje se vrsta službi zaštite i spašavanja i jedinica, kao i njihova namjena i zadaci koje će obavljati, način popune službi zaštite i spašavanja i jedinica ljudstvom i materijalno-tehničkim i drugim sredstvima i uređuju druga pitanja od značaja za organizaciju i njihov rad.

Član 2. (Cilj formiranja i namjena službi zaštite i spašavanja i jedinica)

(1) Službe zaštite i spašavanja i jedinice se formiraju, opremaju i osposobljavaju kao organizovane snage civilne zaštite, koje raspolažu savremenim sredstvima i opremom, te obučanim ljudstvom radi neposrednog angažovanja na izvršavanju složenijih i istovrsnih zadataka zaštite i spašavanja ljudi i materijalnih dobara od prirodnih i drugih nesreća.

(2) Službe zaštite i spašavanja i jedinice predviđene ovom Uredbom namijenjene su da djeluju na području cijelog Kantona, u svim slučajevima kada službe zaštite i spašavanja, jedinice civilne zaštite i druge organizovane snage civilne zaštite opštine na čijem području je nastala prirodna i druga nesreća, nisu dovoljne da brzo i efikasno izvrše sve zadatke na zaštiti i spašavanju ugroženih ljudi i materijalnih dobara u odnosu na poslove za koje su nadležne te službe i jedinice, a u skladu sa naredbama Štaba civilne zaštite Kantona Sarajevo (u daljnjem tekstu: Štab).

Član 3.

(Polazište za formiranje službi zaštite i spašavanja i jedinica)

Prilikom odlučivanja o formiranju službi zaštite i spašavanja i jedinica polazi se od Procjene ugroženosti Kantona Sarajevo od prirodnih i drugih nesreća (u daljnjem tekstu: Procjena ugroženosti) u kojoj je utvrđeno, da je na nivou Kantona potrebno formirati službe zaštite i spašavanja samo u oblastima u kojima opštine zbog nepostojanja uslova, ne mogu formirati te službe ili ne mogu formirati dovoljan broj tih službi, odnosno nemaju uslove za formiranje određenih vrsta jedinica.

POGLAVLJE II. ORGANIZOVANJE SLUŽBI ZAŠTITE I SPAŠAVANJA, NJIHOVI POSLOVI I ZADACI I NAČIN RADA

Član 4.

(Uslovi za formiranje službi zaštite i spašavanja)

Službe zaštite i spašavanja predviđene ovom Uredbom formiraju se u pravnim licima i u udruženjima građana koja ispunjavaju slijedeće uslove:

- a) da je njihova djelatnost ili dio djelatnosti takve vrste koja je od značaja za zaštitu i spašavanje ljudi i materijalnih dobara od prirodnih i drugih nesreća,
- b) da imaju stručne kadrove i odgovarajuću opremu, tehnička i druga sredstva koja omogućavaju vršenje poslova iz nadležnosti službe zaštite i spašavanja,
- c) da imaju mogućnost pružiti ispomoć službama zaštite i spašavanja koje formira opština kada se naredi njihovo angažovanje na tim zadacima.

Član 5.

(Pravna lica i udruženja građana u kojima se organizuju službe zaštite i spašavanja)

Polazeći od kriterija iz člana 4. ove Uredbe, a u skladu sa potrebama koje su utvrđene u Procjeni ugroženosti, službe zaštite i spašavanja na nivou Kantona, organizuju se u slijedećim pravnim licima i udruženjima građana:

- a) Služba za radiološku zaštitu formira se u laboratoriji za analizu radioaktivnosti u Veterinarskom fakultetu Sarajevo, odsjek za radiologiju i atomsku hemiju,
- b) Služba za epidemiologiju, mikrobiologiju i zaštitu i unapređenje životne sredine formira se u Zavodu za javno zdravstvo Kantona Sarajevo,.
- c) Služba za medicinsku pomoć formira se u JU Opća bolnica „Prim. dr. Abdulah Nakaš“ Sarajevo,
- d) Služba za veterinarske poslove (veterinarska služba) formira se u KJP „Veterinarska stanica“ d.o.o. Sarajevo,
- e) Služba za zaštitu od požara u šumama formira se u KJP za gospodarenje državnim šumama “Sarajevo šume” d.o.o. Sarajevo,
- f) Služba za vodosnabdijevanje formira se u KJKP “Vodovod i kanalizacija” d.o.o. Sarajevo,
- g) Gorska služba spašavanja formira se u okviru Gorske službe spašavanja, stanice Sarajevo,

- h) Služba za sječu i uklanjanje oštećenih stabala sa zelenih površina i saobraćajnica formira se u KJKP "Park" d.o.o. Sarajevo,
- i) Služba za smještaj ugroženog i nastradalog stanovništva i snabdijevanje formira se u Crvenom križu Kantona Sarajevo.

Član 6.

(Poslovi i zadaci službi zaštite i spašavanja)

(1) Služba za radiološku zaštitu vrši poslove koji se odnose na zaštitu od zračenja, izviđanja (detekcija, identifikacija i obilježavanje kontaminiranog prostora), dozimetrijsku kontrolu i laboratorijsku obradu i utvrđivanje nalaza prikupljenih uzoraka, obavlja kontrolu radioaktivnih materijala na i u životinjama, mesu, mlijeku i proizvodima životinjskog porijekla, hrani i vodi za životinje i druge poslove koji se odnose na bilo koju vrstu radiološke zaštite na području Kantona.

(2) Služba za epidemiologiju, mikrobiologiju i zaštitu i unapređenje životne sredine će za potrebe zaštite i spašavanja ljudi od prirodnih i drugih nesreća vršiti kontrolu higijensko-epidemiološke situacije, laboratorijsku analizu uzoraka u slučaju masovnih epidemija i trovanja, organizirati i provoditi protivepidemijske mjere, obavljati javno-zdravstvene mikrobiološke djelatnosti, pratiti, proučavati i ocjenjivati higijensku ispravnost vode za piće, površinskih i otpadnih voda i stanje vodoopskrbe na terenu i kontrolu zdravstvene ispravnosti namirnica i predmeta opće upotrebe, vršiti serološku dijagnostiku brucela i Q groznice, pratiti, analizirati i ocjenjivati uticaj okoliša (zrak, tlo, buka) na zdravstveno stanje ljudi na području Kantona u saradnji sa ekipama crvenog križa, građanima i stanicom hitne pomoći.

(3) Služba za medicinsku pomoć vrši poslove zaštite i spašavanja kada prirodne i druge nesreće izazovu velike gubitke u ljudstvu sa velikim brojem povrijeđenih, koje prevazilaze kapacitete lokalnih zdravstvenih ustanova. U tim slučajevima ta služba vrši poslove koji se odnose na pružanje usluga specijalističko-konsultativne zdravstvene zaštite, koja obuhvata zdravstvene usluge u slučaju urgentnih stanja, pruža hitnu stručnu i organizovanu medicinsku pomoć povrijeđenim ili naglo oboljelim ljudima na mjestu povrede i oboljenja, odnosno na mjestu nastanka prirodne ili druge nesreće i vrši njihov transport do zdravstvene ustanove na području Kantona.

(4) Veterinarska služba vrši poslove koji se odnose na terensku i laboratorijsku dijagnostiku zaraznih, parazitnih i drugih oboljenja životinja; prati, istražuje, unapređuje i primjenjuje metode otkrivanja, suzbijanja i prevencije zaraznih, parazitnih i drugih oboljenja životinja; planira i predlaže mjere dezinfekcije, dezinfekcije i deratizacije radi sprečavanja širenja i suzbijanja zaraznih oboljenja životinja; istražuje način zaštite od zoonoza; prati, analizira i ocjenjuje uticaj okoliša na zdravstveno stanje životinja; obavlja laboratorijske pretrage proizvoda životinjskog porijekla i vode u proizvodnim pogonima i vrši druge poslove zaštite i spašavanja iz oblasti veterinarstva na području Kantona.

(5) Služba za zaštitu od požara u šumama vrši operativne mjere zaštite i spašavanja koje se prvenstveno odnose na zaštitu šuma i objekata i druge imovine od požara na pogođenom području, te operativne mjere u fazi spašavanja i fazi otklanjanja propisane članom 20. Pravilnika o organizovanju službi zaštite i spašavanja i jedinica civilne zaštite, njihovim poslovima i načinu rada („Službene novine Federacije Bosne i Hercegovine“, broj 77/06 – u daljnjem tekstu: Pravilnik o organizovanju službi zaštite i spašavanja i jedinica).

(6) Služba za vodosnabdijevanje vrši operativne mjere zaštite i spašavanja koje se odnose na snabdijevanje građana pitkom vodom na pogođenom području, kao i operativne mjere u fazi spašavanja i fazi otklanjanja određene članom 15. Pravilnika o organizovanju službi zaštite i

spašavanja i jedinica, te druge poslove za koje su osposobljeni u cilju zaštite i spašavanja ljudi i materijalnih dobara.

(7) Gorska služba spašavanja obavlja operativne mjere zaštite i spašavanja koje se odnose na spašavanje u planinama, na stijenama, speleološkim objektima i drugim nepristupačnim mjestima, pri nepovoljnim vremenskim uvjetima (snijeg, hladnoća, led, magla i sl.), kada pri spašavanju treba primijeniti posebno stručno znanje i upotrijebiti odgovarajuću opremu za spašavanje u planinama na pogođenom području, te operativne mjere u fazi spašavanja i fazi otklanjanja određene članom 27. Pravilnika o organizovanju službi zaštite i spašavanja i jedinica.

(8) Služba za sječu i uklanjanje oštećenih stabala sa zelenih površina i saobraćajnica vrši operativne mjere zaštite i spašavanja koje se odnose na orezivanje grana (osušenih, polomljenih i sl.), orezivanje i rasterećenje lisne mase s krošnja stabala, kao i sječu oštećenih i polomljenih stabala koja predstavljaju opasnost po ljude i materijalna dobra, te njihovo uklanjanje. Po naredbama Štaba pomoću hidrauličnih auto-dizalica obavlja poslove na visinama (hitne intervencije uklanjanja snijega i ledenica i drugog materijala sa oštećenih krovova objekata).

(9) Služba za smještaj ugroženog i nastradalog stanovništva i snabdijevanje vrši operativne mjere zaštite i spašavanja koje se odnose na organizaciju i pripremu objekata za smještaj ugroženog i nastradalog stanovništva, postavljanje šatorskih naselja sa infrastrukturom, kao i organizaciju prijema i smještaja ugroženog i nastradalog stanovništva u navedene objekte i organizaciju dežurstva u istim, pružanju prve medicinske pomoći, te operativne mjere zaštite i spašavanja koje se odnose na organizaciju, pripremu i distribuciju hrane, odjeće i obuće, lijekova i drugih roba široke potrošnje za nastradalo i ugroženo stanovništvo na pogođenom području i druge poslove za koje su osposobljeni u cilju zaštite i spašavanja ljudi i materijalnih dobara.

Član 7.

(Organizacija službi zaštite i spašavanja u udruženjima građana i nevladinim organizacijama)

(1) Pored službi iz člana 5. ove Uredbe, Kantonalna uprava civilne zaštite (u daljnjem tekstu: Uprava) određuje udruženja građana i nevladine organizacije čija je djelatnost od značaja za zaštitu i spašavanje i sa tim udruženjima i organizacijama može zaključiti sporazum o načinu i uslovima njihovog angažovanja na zadacima zaštite i spašavanja na području Kantona koje time imaju status službe zaštite i spašavanja.

(2) U sporazumu iz stava (1) ovog člana utvrđuju se prava i obaveze o međusobnim odnosima u angažovanju tih udruženja i nevladinih organizacija na zadacima zaštite i spašavanja, kao i obaveze Uprave prema tim udruženjima i organizacijama koje se odnose na obezbjeđenje određenih finansijskih sredstava za nabavku opreme i drugih sredstava rada koja su potrebna za rad tih udruženja i organizacija na zadacima zaštite i spašavanja.

Član 8.

(Zadaci rukovodioca pravnih lica)

Rukovodioci pravnih lica, odnosno udruženja građana iz člana 5. ove Uredbe, u kojima se formiraju predviđene službe zaštite i spašavanja, u saradnji sa Upravom vrše slijedeće poslove:

- a) svojim aktom formiraju službu, određuju rukovodioca službe i broj pripadnika službe,
- b) popunu službe vrše zaposlenicima koji se nalaze na radu u pravnom licu, odnosno članovima udruženja građana koji su obučeni i osposobljeni za vršenje poslova iz nadležnosti službe,

- c) utvrđuju potrebe u opremi, tehničkim i drugim sredstvima rada koja su neophodna za rad službe zaštite i spašavanja i preduzimaju mjere za obezbjeđenje te opreme i sredstava,
- d) organizuju i provode obučavanje pripadnika službe za uspješno vršenje poslova zaštite i spašavanja iz nadležnosti službe,
- e) u roku od šest mjeseci od potpisivanja ugovora iz člana 12. ove Uredbe izrađuju vlastite procedure rada za procese djelovanja u slučajevima angažovanja na zadacima zaštite i spašavanja iz nadležnosti službe.

Član 9.

(Djelovanje službi zaštite i spašavanja u tri faze)

Službe zaštite i spašavanja iz člana 5. ove Uredbe, poslove iz svoje nadležnosti vrše u fazi nastanka prirodne i druge nesreće i u fazi otklanjanja i saniranja nastalih posljedica, a zadatke koji se odnose na preventivnu zaštitu ostvaruju u okviru obavljanja redovne djelatnosti u pravnom licu, odnosno udruženju građana u kojima su formirane.

Član 10.

(Izvori i raspodjela finansijskih sredstava za rad službi)

(1) U cilju stvaranja uslova da službe zaštite i spašavanja iz člana 5. ove Uredbe mogu vršiti poslove zaštite i spašavanja predviđene ovom Uredbom, Uprava će planirati odgovarajuća sredstva u Budžetu Kantona, kao i dio sredstava iz posebne naknade za zaštitu i spašavanje koja pripadaju Kantonu prema članu 180. Zakona o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“, br. 39/03, 22/06 i 43/10 – u daljnjem tekstu: Zakon o zaštiti i spašavanju), koja će se koristiti za nabavku opreme, tehničkih i drugih sredstava koja su neophodna za rad tih službi, za obučavanje i osposobljavanje njihovih članova koji obavljaju poslove iz nadležnosti službe zaštite i spašavanja.

(2) Finansijska sredstva iz stava (1) ovog člana obezbjeđuju se samo za finansiranje onog dijela aktivnosti službi zaštite i spašavanja koje će one vršiti kao dio dodatne djelatnosti koja se odnosi na zaštitu i spašavanje ljudi i materijalnih dobara od prirodnih i drugih nesreća, koji su ovom Uredbom i ugovorom iz člana 12. ove Uredbe, stavljeni u nadležnost tih službi.

(3) Raspodjelu sredstava iz stava (1) ovog člana, na pojedine službe zaštite i spašavanja, sa podacima o vrsti i količini sredstava koja treba nabaviti vrši Uprava na zahtjev organa i pravnih lica iz člana 5. ove Uredbe, a u okviru zadataka iz stava (2) ovog člana i u skladu sa godišnjim programom razvoja, godišnjim finansijskim planom i godišnjim programom rada tih službi.

(4) Kada opštinske službe zaštite i spašavanja za zaštitu od požara intervenišu na području Kantona na zahtjev Kantonalne uprave civilne zaštite ili Kantonalnog štaba civilne zaštite, troškovi intervencije (gorivo, uništena oprema, dnevnice i dr.) će se finansirati iz sredstava posebne naknade za zaštitu i spašavanje koja pripadaju Kantonu.

Član 11.

(Korištenje opreme i tehničkih sredstava)

Pravna lica i udruženja građana iz člana 5. ove Uredbe u kojima su formirane službe zaštite i spašavanja, opremu i tehnička sredstva nabavljena iz sredstava člana 10. ove Uredbe mogu koristiti za obavljanje svoje redovne djelatnosti s tim da su dužni obezbijediti efikasno funkcionisanje službi zaštite i spašavanja kada se naredi njihovo angažovanje što se bliže uređuje ugovorom iz člana 12. ove Uredbe.

Član 12.
(Zaključivanje ugovora)

(1) Uprava će sa pravnim licima i udruženjima građana iz člana 5. ove Uredbe, zaključiti ugovor o međusobnim pravima i obavezama i utvrditi konkretne zadatke službi u pitanjima zaštite i spašavanja ljudi i materijalnih dobara od prirodnih i drugih nesreća, kao i način djelovanja službi kada Štab donese naredbu o njihovom angažovanju na zadacima zaštite i spašavanja na području Kantona.

(2) Zaključivanje ugovora iz stava (1) ovog člana vrši se onda kada Uprava utvrdi da je pravno lice, odnosno udruženje građana ispunilo uslove iz člana 8. ove Uredbe, a pravno lice i udruženje građana koje ne ispunji te uslove nema status službe zaštite i spašavanja.

Član 13.
(Angažovanje službi zaštite i spašavanja)

(1) Angažovanje službi zaštite i spašavanja iz člana 5. ove Uredbe na zadacima zaštite i spašavanja, u uslovima iz člana 9. ove Uredbe, u vrijeme i mjestu za njihovo djelovanje na području Kantona, naređuje Štab, samoinicijativno ili na prijedlog Uprave.

(2) Kada Štab iz stava (1) ovog člana naredi angažovanje službi zaštite i spašavanja, rukovodioci pravnih lica i udruženja građana iz člana 5. ove Uredbe, u kojima su formirane službe zaštite i spašavanja, dužni su preduzeti sve potrebne mjere kojima će obezbijediti da službe pravovremeno dođu na mjesto određeno naredbom Štaba i da mogu vršiti zadatke iz svoje nadležnosti.

(3) Izuzetno, u hitnim slučajevima kada ne postoji mogućnost da se u što kraćem roku održi sjednica Štaba, angažovanje službi zaštite i spašavanja iz člana 5. ove Uredbe, može da naredi komandant odnosno načelnik Štaba, ako je komandant odsutan, o čemu je dužan blagovremeno obavijestiti komandanta tog Štaba.

(4) Službe zaštite i spašavanja iz člana 5. ove Uredbe, angažuju se onda kada Vlada Kantona Sarajevo proglasi nastanak prirodne i druge nesreće na području Kantona, a izuzetno, angažovanje tih službi može se izvršiti i prije proglašenja prirodne i druge nesreće, u slučaju kada prijete neposredna opasnost od nastanka prirodne i druge nesreće u cilju preduzimanja odgovarajućih mjera na sprečavanju nastanka te opasnosti ili nesreće ili ublažavanja njihovog djelovanja.

Član 14.
(Obaveze Uprave)

Uprava će preduzimati odgovarajuće aktivnosti na formiranju službi zaštite i spašavanja iz člana 5. ove Uredbe, njihovoj popuni ljudstvom i materijalno-tehničkim sredstvima, obučavanju i stručnom osposobljavanju i u tim pitanjima pružati odgovarajuću stručnu i drugu pomoć i starati se da službe budu osposobljene za vršenje zadataka za koje su formirane, a pravna lica i udruženja građana iz člana 5. ove Uredbe, su dužna postupiti po zahtjevima Uprave.

POGLAVLJE III. ORGANIZOVANJE JEDINICA, NJIHOVI POSLOVI I ZADACI I NAČIN RADA

Član 15.

(Jedinice koje se organizuju u Kantonu)

(1) Na osnovu potreba utvrđenih u Procjeni ugroženosti, kao i ljudskih, materijalnih i drugih mogućnosti kojima raspolaže Kanton, na nivou Kantona, organizuju se jedinica za radiološko-hemijsku i biološku zaštitu (u daljnjem tekstu: jedinica za RHB zaštitu).

(2) Pored jedinice iz stava (1) ovog člana, mogu se formirati i druge jedinice, ako se na osnovu Procjene ugroženosti utvrdi potreba za njihovim organizovanjem.

Član 16.

(Poslovi i zadaci jedinice za RHB zaštitu)

Jedinica za RHB zaštitu vrši poslove radiološko-hemijskog i biološkog izviđanja i dozimetrijske kontrole, učestvuje u akcijama zaštite i spašavanja pri pojavi havarija i akcidenata, radijacijsko-hemijskog i biološkog porijekla, a može se angažovati i na drugim zadacima koji se odnose na RHB zaštitu.

Član 17.

(Način i vrijeme popune)

Popuna jedinica iz člana 15. ove Uredbe ljudstvom i materijalno-tehničkim i drugim sredstvima obavlja se u skladu sa Zakonom o zaštiti i spašavanju i Pravilnikom o organizovanju službi zaštite i spašavanja i jedinica, kada jedinice budu formirane i kada budu utvrđene njihove lične i materijalne formacije.

Član 18.

(Način finansiranja jedinica)

(1) U cilju stvaranja uslova da jedinice iz člana 15. ove Uredbe, mogu vršiti poslove zaštite i spašavanja predviđene ovom Uredbom, Uprava će planirati odgovarajuća sredstva u Budžetu Kantona, kao i dio sredstava iz posebne naknade za zaštitu i spašavanje koja pripadaju Kantonu prema članu 180. Zakona o zaštiti i spašavanju, koja će se koristiti za nabavku opreme, tehničkih i drugih sredstava koja su neophodna za rad tih jedinica i za obučavanje i osposobljavanje njihovih pripadnika koji obavljaju poslove iz nadležnosti jedinica.

(2) Finansijska sredstva iz stava (1) ovog člana obezbjeđuju se samo za finansiranje aktivnosti jedinica koje će one vršiti na zaštitu i spašavanje ljudi i materijalnih dobara od prirodnih i drugih nesreća, koji su ovom Uredbom stavljeni u nadležnost tih jedinica.

Član 19.

(Upotreba jedinica)

Upotreba jedinica iz člana 15. ove Uredbe, na zadacima zaštite i spašavanja na području Kantona, vrši se u skladu sa Planom zaštite i spašavanja ljudi i materijalnih dobara od prirodnih i drugih nesreća Kantona.

Član 20.
(Način angažovanja jedinica)

(1) Jedinice iz člana 15. ove Uredbe se angažuju za potrebe Kantona, naredbom o upotrebi jedinica na zadacima zaštite i spašavanja, koju donosi Štab, na osnovu prethodno izvršene procjene o vrsti prirodne i druge nesreće, području na kojemu djeluje ta nesreća i obimu i vrsti mogućih posljedica po ljude i materijalna dobra na ugroženom području.

(2) Izuzetno od stava (1) ovog člana, u hitnim slučajevima kada ne postoji mogućnost da se u što kraćem roku održi sjednica Štaba, angažovanje jedinica iz člana 15. ove Uredbe, može da naredi komandant Štaba, odnosno načelnik Štaba ako je komandant odsutan, o čemu je dužan blagovremeno obavijestiti komandanta Štaba.

Član 21.
(Vrijeme obavljanja poslova i situacije u kojima se angažuju jedinice)

(1) Jedinice iz člana 15. ove Uredbe poslove zaštite i spašavanja za koje su formirane, vrše u fazi spašavanja ljudi i materijalnih dobara koji su ugroženi ili nastradali djelovanjem prirodne i druge nesreće i u fazi otklanjanja posljedica nastalih od tih nesreća, a u slijedećim situacijama:

- a) u kojima se primijete opasnosti ili pojave koje mogu dovesti do nastanka prirodne i druge nesreće, koje zahtijevaju provođenje mjera i aktivnosti na sprečavanju nastanka te prirodne i druge nesreće ili ublažavanju njenog djelovanja,
- b) od momenta kada nadležni organ vlasti proglasi stanje prirodne i druge nesreće, što zahtijeva provođenje akcija zaštite i spašavanja ugroženih ljudi i materijalnih dobara, do otklanjanja posljedica koje su nastale djelovanjem te prirodne i druge nesreće, odnosno do momenta kada Štab naredi prestanak njihovog rada, odnosno do dana kada nadležni organ vlasti donese odluku o prestanku stanja prirodne i druge nesreće,
- c) za vrijeme vježbi civilne zaštite i drugih oblika obuke u civilnoj zaštiti,
- d) za vrijeme ratnog stanja.

(2) Izuzetno od stava (1) ovog člana, određene jedinice mogu se angažovati i u fazi preventivne zaštite kada prijeti neposredna opasnost od nastanka prirodne ili druge nesreće, kada se ocijeni da je neophodno angažovanje određene jedinice, ako takvo angažovanje naredi nadležni štab civilne zaštite.

Član 22.
(Područje na kojem se mogu angažovati jedinice)

Jedinice iz člana 15. ove Uredbe, upotrebljavaju se na zadacima zaštite i spašavanja na području Kantona, s tim da se te jedinice mogu upotrijebiti i na području drugoga kantona, o čemu odlučuje nadležni štab civilne zaštite, koji rukovodi akcijama zaštite i spašavanja na određenom području.

Član 23.
(Poslovi Uprave vezani za jedinice)

Uprava obavlja dvije vrste poslova koji se odnose na jedinice iz člana 15. ove Uredbe, i to:

- a) obavlja sve poslove i zadatke koji su potrebni da se formira jedinica i priprema odgovarajuća akta za njihovo formiranje,

- b) po njihovom formiranju, obavlja poslove koji se odnose na popunu jedinica ljudstvom i materijalno-tehničkim sredstvima i njihovo obučavanje i osposobljavanje.

POGLAVLJE IV. PRIJELAZNE I ZAVRŠNE ODREDBE

Član 24.

(Rok za formiranje službi zaštite i spašavanja i jedinica)

Službe zaštite i spašavanja iz člana 5. ove Uredbe i jedinice iz člana 15. ove Uredbe formirat će se u roku od tri mjeseca od dana stupanja na snagu ove Uredbe.

Član 25.

(Prestanak primjene odredbi drugih uredbi)

Danom stupanja na snagu ove Uredbe, prestaju da važe Uredba o organizovanju službi zaštite i spašavanja Kantona Sarajevo („Službene novine Kantona Sarajevo“, broj 2/08) i Uredba o organizovanju jedinica civilne zaštite specijalizovane namjene Kantona Sarajevo („Službene novine Kantona Sarajevo“, broj 2/08).

Član 26.

(Stupanje na snagu Uredbe)

Ova Uredba stupa na snagu narednog dana od dana objavljivanja u „Službenim novinama Kantona Sarajevo“.

Broj 02-05-20122-5/13
24. jula 2013. godine
Sarajevo

Premijer
Suad Zeljković, s. r.